

Alti Mondschyn-Clique

1894—1930

Fasnacht 1930



Schnitzelbangg

(Vierstimmig)

Was ain au immer boosge mag,
Au wenn er's haimlig macht,
Nit numme d'Sunne bringt's an Dag,
Der Mondschyn bringt's an d'Nacht.
Wär d'Kuech gmacht het im letschte Jahr,
Vergässe wird's e kaim;
: Der Mondschyn nimmt si hit am Ohr
Und zindet jedem haim. :|

E Ressler, wo der Haber sticht,
Das schloht bikanntlig us;
Im A. C. V. — die alti Gschicht —
Si ziehn kai Lehr sich drus.
Die aigne Schybe schloht me-n-y,
Me bringt sich uff der Hund
: Und ka im Friehlig Zyge sy
Vom Dividändeschwund. :|

E Fabrikant vom Heroin,
Wo d'Santihans biwohnt,
Näbscht Analyse vom Urin
Macht Gift er, was sich löhnt,
Bis d'Polizei derhinder kunnt
Und nimmt en schliesslig hoch. —
: Gib achtig, Vogel, tryb's nit z'bunt,
Denn's Zuchthuus, das isch nooch. :|

Wil z'Basel so-n-e Huuffe Lyt
Abzahligsauti hän,
Bigryfft me, dass si mit der Zyt
E Gratisparking wän.
Me het ene der Märtplatz gäh;
's tuet mängem guet, myseel,
: Und d'Märtlyt kenne Waidlig näh,
Fir z'gondle-n-uff em Eel. :|

Am rote Träfle het der Franz
Sy Pflutter laufe loh
Und hätt, trotz sym Tribuneglantz,
Ins Keefi solle goh.
Er het sich gspeert und proteschiert,
Gholt het me-n-en jo doch;
: s'rot Träfle het er repetiert
Fir sich ellai im Loch. :|

E Trummlerclub — Elitecorps! —
Wo sunscht in Basel fuesst,
In Barcelona stellt er vor
Im Keenig sich und ruesst.
Der Guschti Sämf, so scheen wie digg,
D'Vergangeheit verschluggt
: Und — 's isch jo no sy ainzig Gligg —
Im Keenig d'Pfote druggt. :|

Der Glopfgaischt gieng schynt's z'Basel um,
Glopf an der Utegass,
Und unser gaischtrych Publikum
Het dra sy Haidegspass.
s' isch schad, ass mir im Rothuus hän
Nit so-n-e Gaischt verstegett,
: Fir dass er die, wo schlofe wän,
Am Säxi z'obe weggt. :|

Im Peschtalozzi-Schuelhuus uss,
Do isch Revolte gsi;
Fir 's Männli z'mache, sin vorus
Go peeble d'Schnuderi.
Im Grosse Rot e Kommunischt
Tritt fir das Gsindel y;
: Wär 's ganz Jahr nielt in jedem Mischt,
Darf au no Luusbueb sy. :|

Uff Basel kunnt e Sunnestrahl,
Denn d'Zahligsbangg zieht y;
Doch schimpft me vyl, wil's Personal
Soll gänzlich styrfrei sy.
Nur d'Tippmamselle, die sin froh,
Ass s'Läbe nit so dyr,
: Und juble-n-alli sowieso:
„I zahl kai Stämpfelstyr!“ :|



Kemmet Alli an Schluss-Obe vo de Comité-Schnitzelbängg, am Sunntig, der 16. März, z'Obe am siebeni im Muusigsaal vom Stadt-Kasino.